



Buletin

Jamadil Akhir 1446H/Disember 2024

ACIS

WANITA DALAM ISLAM

eISSN 2600-8289



9 772600 828001

Fiqh Wanita: Keharusan Hukum Menziarahi Kubur



Oleh:

Dr. Mohd Kamel bin Mat Salleh

Pensyarah Kanan Akademi Pengajian Islam Kontemporari (ACIS), UiTM Cawangan Negeri Sembilan, Kampus Seremban.

Islam membenarkan penganutnya menziarahi kubur sama ada kepada kaum lelaki mahupun perempuan. Ini berdasarkan kepada umum hadith maksudnya "*daripada Buraidah al-Husaib al-Aslami ra berkata : bahawa Rasulullah s.a.w. telah bersabda, aku pernah melarang kamu menziarahi kubur, maka kini ziarahilah ia (Riwayat Muslim, Imam at-Tirmizi menambah : kerana ziarah kubur itu mengingatkan kepada hari akhirat)*".

Sebenarnya, larangan dan tegahan itu merujuk kepada zaman awal Islam. Generasi itu baru sahaja meninggalkan zaman jahiliah dan masih berada dalam keadaan di mana mereka tidak dapat mengelak daripada ucapan kotor dan keji seperti meratap, meraung dan menjerit, yang selama ini menjadi kebiasaan mereka. Apabila Islam tiba, amalan jahiliah telah dihapuskan dan kehidupan mereka semakin aman. Islam juga telah menetapkan aturannya sendiri mengenai jenazah dan kematian, yang membolehkan orang menziarahi kubur.

Dalam hadith yang lain, daripada Abu Hurairah maksudnya "*bahawa Nabi S.A.W. pergi menziarahi makam ibunya, baginda menangis dan orang-orang di sekelilingnya turut menangis. Nabi S.A.W. telah bersabda: aku telah memohon keizinan kepada Tuhanku untuk memohon ampun bagi ibuku tetapi Dia tidak mengizinkannya. Oleh sebab itu aku meminta izin menziarahi makamnya, maka diizinkannya, maka ziarahilah kubur kerana ia akan mengingatkan kepada kematian*" (Riwayat Imam Ahmad dan Muslim serta Ashab Sunan kecuali at-Tirmizi).

Berdasarkan kepada dua hadith yang dinyatakan di atas menunjukkan bahawa tujuan menziarahi kubur untuk muhasabah diri dan memberi keinsafan kepada penziarah kerana ia dapat mengingatkan kepada kematian serta hari akhirat. Dengan sebab itu tidak menjadi halangan kepada sesiapa sahaja untuk menziarahi kubur.

Kita masuk kepada perbincangan berkenaan dengan hukum dan permasalahan ziarah kubur bagi kaum wanita. Ada pendapat yang memakruhkannya, namun makruh ini pun masih diperselisihkan kerana ada pendapat yang menyatakannya ia adalah *karahah tahrim* (larangan yang menunjukkan haram) dan ada yang menjelaskannya sebagai *karahah tanzih* (larangan yang menunjukkan makruh). Imam an-Nawawi di dalam al-Majmu' menganggapnya sebagai "*karahah tanzih*" dan inilah yang dipegang oleh jumhur al-Syafiiyyah.

Berikut adalah rujukan beberapa hadith sebagai dalil keharusan bagi kaum wanita menziarahi kubur: Saidatina

Aisyah telah bertanya kepada Nabi S.A.W. maksudnya: "*apakah yang harus diucapkan semasa menziarahi kubur? Baginda menjawab "ucapkanlah: salam atasmu wahai penduduk kampung dari golongan mukminin dan muslimin dan semoga Allah melimpahkan rahmatNya kepada kita semua sama ada mereka yang telah terdahulu mahupun yang akan datang, Insyaallah kami akan menyusul kemudian"* (Riwayat Muslim).

Berdasarkan hadith ini, Rasulullah S.A.W. mengajar kepada Saidatina Aisyah tentang doa yang sepatutnya dibaca sewaktu menziarahi tanah perkuburan tanpa baginda menyatakan sebarang tegahan dan larangan. Ini menunjukkan bahawa tidaklah menjadi suatu larangan hukum ziarah kubur bagi kaum wanita.

Riwayat daripada Ibn Mulaikah bahawa pada suatu hari, Saidatina Aisyah kembali dari arah tanah perkuburan, Ibn Mulaikah bertanya, maksudnya: "*wahai ummul mukminin, dari mana engkau datang? Aisyah menjawab, dari menziarahi kubur saudaraku Abdul Rahman. Aku bertanya lagi, bukankah Rasulullah S.A.W. melarang dari menziarahi kubur? Beliau menjawab, benar bahawa Rasulullah pernah melarang dari menziarahinya tetapi kemudian baginda membenarkannya* (Riwayat al-Hakim, juga oleh al-Baihaqi yang menyatakan pada sanadnya terdapat Bustam b. Muslim al-Basri yang meriwayatkan seorang diri, manakala menurut al-Zahabi, hadith tersebut sahih).

Daripada Anas r.a maksudnya: "*bahawa Rasulullah telah lalu di tanah perkuburan dan baginda melihat seorang perempuan yang menangis kematian anaknya. Rasulullah berkata, bertakwalah kamu kepada Allah dan bersabarlah. Perempuan itu menjawab: alangkah malangnya daku ditimpa musibah ini. Apabila Rasulullah berlalu pergi, ada orang menyatakan kepada perempuan itu bahawa lelaki itu ialah Rasulullah, bagaikan dikejar maut, perempuan itu bergegas pergi ke rumah Nabi dan tiada seorang pun penjaga pintu di situ, perempuan itu berkata, wahai Rasulullah, aku tidak mengenali bahawa engkau adalah Rasulullah, Nabi bersabda, bahawa sesungguhnya kesabaran itu adalah ketika mula-mula ditimpa musibah"* (Riwayat al-Bukhari dan Muslim).

Dalam hadith ini, Baginda S.A.W. telah melihat dan bertemu serta berbual-bual dengan perempuan tersebut tanpa larangan terhadap perbuatan menziarahi kubur adalah bukti bahawa kaum perempuan tidak berhalangan menziarahi kubur. Jika ianya suatu tegahan, sudah pasti Rasulullah akan menjelaskannya.

Golongan yang menyatakan makruh bagi kaum wanita menziarahi kubur berpandukan kepada hadith Nabi yang mengutuk wanita-wanita yang menziarahi kubur. Hujah mereka lagi bahawa kaum wanita kurang tabah dan lebih mudah terpengaruh.

Dalam menjawab dakwaan ini, al-Qurtubi ada menyatakan yang dipetik oleh Sayyid Sabiq di dalam kitabnya *Fiqh al-Sunnah* "kutukan itu hanyalah kepada wanita-wanita yang selalu sangat menziarahi dalam erti kata perempuan yang selalu sangat menziarahi kubur kerana mungkin kesan daripada ziarah itu akan mengakibatkan tersia hak suami, memperagakan diri, kemungkinan menangis, meratap dan lain-lain".

Kata al-Qurtubi lagi, kalau semua itu dapat diatasi, maka tidak ada alasan untuk menghalang wanita menziarahi kubur kerana mengingati maut itu tidak dikhususkan kepada sesiapa baik lelaki mahupun wanita. Al-Syaukani menambah atas keterangan al-Qurtubi itu "pendapat inilah yang harus dipegang dalam menghimpunkan hadith-hadith yang pada zahirnya bertentangan"

Berikut adalah antara beberapa adab yang diajar oleh Islam apabila seseorang menziarahi tanah perkuburan sama ada kepada kaum lelaki ataupun wanita.

1. Apabila seseorang telah sampai di tanah perkuburan, hendaklah dia menghadap ke arah muka mayat dan memberi salam serta mendoakannya. Di antara doa dan ucapan yang diajar oleh Nabi S.A.W. semasa melewati tanah perkuburan ialah "salam atasmu wahai penduduk kampung dari golongan mukminin dan muslimin, kami Insyaallah akan mengikuti kamu, kamu adalah sebagai pelopor kami dan kami akan menjadi pengikut kamu dan kami memohon kepada Allah agar kami dan kamu juga dilimpahi keselamatan oleh Allah" (Riwayat Muslim).

Dalam Riwayat yang lain Nabi SAW mengajarkan doa berikut yang bermaksud: "salam sejahtera ke atas mu wahai ahli kubur, semoga Allah mengampunkan dosa kami dan dosa kamu, kamu adalah golongan perintis dan kami akan menuruti jejakmu" (Riwayat al-Tirmizi).

Sabdanya lagi yang bermaksud "salam sejahtera ke atas mu wahai penduduk kampung dari kalangan mukminin, dan nanti pada waktu yang telah ditentukan, kamu akan menemui apa yang dijanjikan, Insyaallah kami akan mengikuti kamu, ya Allah ampunilah dosa ahli Baqi' yang berbahagia ini" (Riwayat Muslim).

2. Penziarah disunatkan menghadap ke kiblat. Ini berdasarkan hadith daripada al-Barra' b. Azib maksudnya: "kami telah keluar bersama Rasulullah S.A.W. mengiringi jenazah seorang lelaki kaum Ansar, kami berhenti di satu kubur yang tidak berlahad, maka Nabi S.A.W. duduk menghadap ke kiblat dan kami pun duduk bersama baginda" (Riwayat Abu Daud).

3. Larangan memijak atau duduk di atas kubur. Nabi S.A.W. menjelaskannya di dalam hadith daripada Abu Hurairah maksudnya "sesungguhnya lebih baik bagi kamu duduk di atas bara api sehingga terbakar pakaian dan melecur kulit daripada duduk di atas kubur" (riwayat Abu Daud).

Di dalam satu hadith lain, Nabi S.A.W. melarang daripada duduk dan bersembahyang di atas kubur. Abdanya yang bermaksud "janganlah kamu duduk di atas kubur dan jangan bersembahyang di atasnya" (Riwayat Abu Daud).

4. Tidak menjadi kesalahan jika membaca ayat-ayat al-Quran untuk disedeqahkan kepada si mati. Mazhab Ahli Sunnah Wal Jamaah berpendapat bahawa manusia yang

masih hidup boleh menjadikan perbuatannya sebagai pahala kepada si mati termasuk bacaan al-Quran. Walaupun pendapat yang mahsyur dalam mazhab Syafie menyatakan bahawa pahala bacaan tidak sampai tetapi Ashab al-Syafie (pengikut mazhab Syafie) menyatakan bahawa pahala bacaan tersebut sampai. Pendapat ini turut dipegang oleh Imam Hanbali.

Menurut seorang ulama besar Universiti al-Azhar Mesir iaitu Syeikh al-Marhum Atiyyah Saqar dalam himpunan fatwanya, tiga cara yang sepatutnya dilakukan berkaitan dengan hal sedekah pahala bacaan al-Quran adalah seperti berikut :

Membaca ayat-ayat al-Quran dan kemudian berdoa supaya dirahmati dan diampunkan dosa si mati. Si mati hendaklah bertawassul dengan perbuatan solehnya iaitu membaca al-Quran dan kemudian doakan kerahmatan buat si mati

Membaca ayat-ayat al-Quran dan kemudian dihadiahkan kepada si mati seperti bacaan : Allahumma awsil thawaba ma qara'nahu li fulan (Ya Allah sampaikanlah pahala apa yang telah kami bacaan kepada ruh si fulan)

Diniatkan terlebih dahulu di permulaan bacaan atau semasa membaca ayat al-Quran bahawa pahala bacaan tersebut adalah untuk si fulan bin si fulan.

Seorang ulama Nusantara iaitu Syeikh Daud al-Fatani pernah ditanya apakah hukumnya membaca doa khatam al-Quran dengan meniatkan pahala bacaan kepada ruh si mati, beliau menyatakan bahawa ia adalah dibenarkan, seperti terjemahan doa ini "ya Allah, jadikanlah pahala bacaan kami sebagai tambahan kemuliaan bagi Nabi s.a.w., dan jadikanlah juga pahala yang sama dan gandakannya untuk ruh si fulan atau dalam suratan amalannya".

Ibn Qudamah dalam kitabnya al-Mughni ada menyebut bahawa pahala bacaan al-Quran kepada si mati sampai kepadanya. Ini berdasarkan kepada satu riwayat daripada Imam Ahmad yang bermaksud "apabila kamu memasuki tanah perkuburan, bacalah ayat al-Kursi dan tiga kali surah al-Ikhlash, kemudian katakanlah: wahai Tuhanku, sesungguhnya bacaan ini adalah untuk ahli kubur".

Manakala dalam kitab al-Tazkirah karangan Imam al-Qurtubi ada juga satu riwayat lain dari Imam Ahmad yang bermaksud "apabila kamu memasuki tanah perkuburan, bacalah al-Fatihah, surah al-Falaq, surah al-Nas dan surah al-Ikhlash, jadikanlah bacaan kamu itu sedekah buat ahli kubur kerana sesungguhnya pahala bacaan itu sampai kepada mereka".

5. Adapun perbuatan yang dilakukan oleh sebahagian orang seperti mengusap kubur, mencium, tawaf dan sebagainya adalah satu perbuatan bid'ah yang mesti di jauhi dan ditinggalkan.

Sesungguhnya Islam membenarkan menziarahi kubur kerana banyak hikmahnya, antaranya ialah jiwa akan sentiasa mengingati mati dan bersedia menghadapinya. Selain ia dapat menghidupkan sunnah, ia juga akan mengingatkan dan menginsafkan penziarah asal usulnya daripada tanah dan ke tanah juga seseorang itu akan kembali.